

四庫全書

史部

欽定四庫全書

史部

欽定八旗通志卷一百八十五

欽定四庫全書

欽定八旗通志卷一百八十五

人物志六十五

大臣傳五十一

蒙古正黃旗下 德參濟旺 洛

阿南達

阿刺納

舒明

薩喇勒

巴爾濟爾

葛勒

德參濟旺

德參濟旺蒙古正黃旗人姓博爾濟吉特世居阿

布罕地方初為察哈爾大臣察哈爾林丹汗不道

天聰六年

上統師往征林丹汗棄故業渡黃河西遁八年復征之林
丹汗歿于大草灘察哈爾亡德參濟旺偕噶爾瑪
濟農多呢庫魯克多爾濟達爾罕諾顏等携衆六
千及家屬來歸

召宴于客瑋

御營德參濟旺率諸臣跪獻酒

諭曰朕本不飲酒念爾新附諸臣誠意當飲盡一卮復酌

酒

親賜之並

賚甲冑衣裘授一等子九年六月察哈爾索木諾台吉率

本部內附

上宴來歸者並

賜德參濟旺飲

諭曰察哈爾國之傾覆爾諸臣之來歸朕皆豫知德參濟

旺奏曰

聖諭及此洵有如神之鑒也順治二年以誣告沙濟降為三等子三年五月蘇尼特部長騰機思與其弟騰機特等叛奔喀爾喀德參濟旺隨豫親王多鐸追勦至謂特克山喀爾喀土謝圖汗車臣汗各遣兵數萬兩路迎戰我師奮擊大敗之先後斬級俘獲甚衆八月提

聞

詔下所司察叙九月復德參濟旺一等子世職五年八月

卒子哈爾瑪襲

洛哩

弟沙哩岱

洛哩姓鄂爾沁初為察哈爾林丹汗護衛天聰六年

太宗文皇帝親統大軍征察哈爾林丹汗驚懼率部衆西渡黃河自竄土默特部尋竄唐古特部而歿洛哩携元初帕斯巴喇嘛所鑄嘛哈噶拉金佛並率百餘人來歸隸蒙古正黃旗予一等輕車都尉世職

崇德三年隨貝勒岳託証明由牆子嶺毀邊牆入
擊敗明總督吳阿衡自密雲迎戰兵六年隨大軍
圍明錦州敵衆出城拒戰我左翼三旗護軍擊之
失利退入壕內敵衆環逼洛哩汎地洛哩奮力拒
戰歿于陣

賜卹晉三等男以其兄沙濟襲洛哩有弟二一烏班和碩
齊一沙哩岱烏班和碩齊亦于林丹汗歿時自察
哈爾率七十人來歸予三等輕車都尉世職既卒

沙哩岱襲沙哩岱初任佐領

世祖章皇帝順治元年隨睿親王多爾袞入山海關以步
戰擊敗流賊李自成三年隨豫親王多鐸征蘇尼
特部騰機斯擊敗土謝圖及碩雷兩汗兵叙功晉
二等輕車都尉十五年沙濟卒沙哩岱併襲三等
男合為二等子世襲罔替尋授散秩大臣十八年
十二月

聖祖仁皇帝即位加恩諸大臣之舊自察哈爾來歸者沙

哩岱與內大臣噶爾瑪散秩大臣札木素等並
賜莊田奴僕康熙九年卒以其從弟之子達爾札襲

阿賴

阿賴姓莽努特世居喀爾喀部

太宗文皇帝時挈家屬來歸隸正黃旗蒙古嘗奉使阿魯
部招降部長數人率衆俱至

上嘉其能

賜號達爾漢優免賦役既而降人復有叛去者外藩蒙古

諸貝勒追之不及阿賴率兵五百窮追數月斬倡
叛者四人盡俘逃衆以還又率兵征喀木尼喀部
擒其部長葉雷獲戶口牲畜無算崇德元年叙功
授一等輕車都尉兼一雲騎尉世職加

賜號曰庫魯克達爾漢三年授禮部右叅政四年擢正黃
旗蒙古都統六年大軍圍明錦州明總督洪承疇
自松山赴援

上親統師征之阿賴受

方畧設伏杏山路側邀擊敵衆斬殪無算尋攻松山城承
疇以衆迎戰阿賴率兵沿濠擊敵射殪數人大軍
並進敵退入城不得收降二千餘衆順治元年同
都統葉臣等招撫山西郡邑凱旋

賜白金三百兩三年隨豫親王多鐸征叛逃蒙古騰機思
等將追及賊衆還戰阿賴先率兵繞出其後俟賊
潰遁截擊擒斬甚衆五年同尚書宗室務達海領
兵駐防漢中六年正月叛鎮姜瓖黨姚舉等陷忻

州阿賴移兵赴援破賊石嶺關進復忻州追勦賊黨屢戰皆捷賊平班師三遇

恩詔晉世職為二等男九年十月

命領兵駐防西安尋還京以老疾解郡統任康熙十二年諭獎久著勞績諸大臣加阿賴太子太保十七年卒

賜祭葬如典禮謚襄武立碑墓道以其弟之孫高良襲世

職

巴賴都爾莽奈

子哈岱

巴賴都爾莽奈蒙古察哈爾人姓烏彌初為察哈爾大臣林丹汗敗奔唐古特巴賴都爾莽奈率二百餘戶駐哈屯河踰一載來歸隸蒙古正黃旗崇德元年授一等男三年隨貝勒岳託征明敗明總兵吳國鎮及內監馮永盛兵敵犯前鋒統領席特庫營率衆擊却之明年隨大兵攻寧遠城中騎兵出戰迎擊破之六年從征錦州敗洪承疇兵于松山杏山間敵屢犯鑲紅旗營擊之俱潰是年掘壕

圍錦州城城內兵突出奮勇逆戰中流矢歿于陣
卹贈三等子越明年以其子哈岱襲爵哈岱年十七隨父
擊寧遠兵敵射巴賴都爾莽奈馬斃哈岱不及甲
胄馳入陣以所乘馬掖其父騰上步從擊敵偕還
上聞而嘉之

賚子甚厚既襲爵從大兵征明敗敵兵于密雲進攻易州
順德克之遂畧地至山東臨清

世祖章皇帝順治元年哈岱隨睿親王多爾袞入山海關

擊敗流賊李自成二年大兵既定江南哈岱隨貝勒博洛征浙江敗敵於海寧縣進攻杭州大破敵兵師還得

優賚三年隨豫親王多鐸征蘓尼特部騰機思敗土謝圖及碩雷兩汗兵四年晉二等子六年隨英親王阿濟格征大同叛鎮姜瓖賊出犯正黃鑲黃兩旗汛哈岱率所屬兵擊却之又與都統鰲拜從濠內擊其後隊有斬獲九年

恩詔予世襲十二年隨定海大將軍伊爾德征舟山海賊
十三年師次定海縣偽總兵陳六御偽伯阮思于
海島列戰艦以待哈岱同護軍叅領桓達理率兵
進攻賊衆敗北追至衡水洋口連斬賊渠俘其餘
黨舟山平十四年晉一等子康熙十四年

聖祖仁皇帝命為內大臣明年以討逆藩吳三桂奉

命同侍衛阿喇尼往喀喇沁翁牛特蘇尼特諸部察閱兵
馬調駐大同河南兗州等府事竣還朝十九年以

疾卒年六十有三

賜祭葬謚勤壯立碑墓道孫阿喇納襲雍正元年

世宗憲皇帝追念巴賴都爾莽奈功

詔祀昭忠祠

阿南達

阿南達蒙古正黃旗人姓烏彌三等子巴賚都爾
莽奈之孫內大臣哈岱之次子也初任侍衛由三
等游擢一等康熙八年輔政大臣鰲拜獲罪拘禁

王大臣等以阿南達素與黨附請革任擬立斬籍
沒得

旨寬免仍任一等侍衛尋兼佐領二十七年噶爾丹侵掠
喀爾喀阿南達奉

命偕喇嘛商南多爾濟齋

敕往諭以休兵和好噶爾丹旋遣使入朝而肆掠如故二

十九年二月

上命阿南達往會喀爾喀都部兵進勦噶爾丹三月以尚書

阿喇尼代之阿南達還奏噶爾丹為托多額爾德
尼擊敗窮蹙奔竄至有兩人共一騎及削木為仗
者請發滿洲勁旅乘機往勦

上命選察哈爾兵六百阿南達率之赴圖拉策應西路都
統額赫訥軍五月阿喇尼奏請移西路軍會勦阿
南達率兵北渡瀚海會

命裕親王福全為撫遠大將軍阿南達以兵會之八月敗
噶爾丹于烏蘭布通三十一年奉

命赴寧夏招和碩特部台吉巴圖爾額爾克濟農來降是

年十一月擢正黃旗蒙古副都統三十二年二月

上聞噶爾丹將取糧哈密

敕郎坦為昭武將軍脩兵寧夏以阿南達屢至邊境偵悉

敵情

命與前鋒統領碩岱同往駐防明年

召還三十五年二月

上親征噶爾丹以撫遠大將軍費揚古率師出西路

命阿南達往喀爾喀諸扎薩克旗分選熟識路徑者二十
人為嚮導五月

上由中路進征至克魯倫河噶爾丹望見

御營大驚奔竄阿南達同費揚古由圖拉進趨昭莫多聞
噶爾丹遁歸特呼勒濟費揚古令阿南達同前鋒
統領碩岱副都統阿迪等率兵先往挑戰佯卻誘
賊至昭莫多大軍合擊敗賊追逐三十里擒斬無
算噶爾丹引數騎遠竄阿南達赴

行在奏捷

召詢交戰情形阿南達具述其詳復奏言陣獲厄魯特人
皆云噶爾丹乍聞哨卒報稱

皇上親征猶不信謂必遣將前來無足懼後有彼所親信
人由大軍縱歸具言

親征果真軍威難敵乃惶懼鼠竄屬下人多怨懟者噶爾
丹亦深以為悔

上曰此番師出即奏膚功皆

上天眷佑也乃班師

命阿南達駐守肅州七月

詔移兵邊境偵噶爾丹聲息相機勦撫阿南達尋疏言昆
都倫額濟內諸處各遣官率兵分駐哨探臣親率
巴圖爾額爾克濟農之兵復與提督李林隆商議
增發綠旗兵携子母礮位赴布隆吉爾相度要隘
分置策應乃還肅州

上以所奏示議政諸臣曰阿南達處處脩兵朕甚嘉之噶

爾丹之自昭莫多敗竄也其部衆多離散噶爾丹
多爾濟者其妻弟也勢窮蹙持兩端阿南達至布
隆吉爾擒其哨卒拜格遣歸招降噶爾丹多爾濟
遂遣使通款阿南達因其使檄諭哈密回人曰聞
逃來人言噶爾丹窮困所屬不及千人無口糧無
冬衣倘來投汝地汝即擒之令噶爾丹多爾濟助
汝汝勿疑又傳語噶爾丹多爾濟曰哈密若有噶
爾丹聲息報汝汝即遣人來報一面往助哈密協

力而行十一月阿南達復往布隆吉爾噶爾丹遣
其族姪固蒙多爾濟等與達賴喇嘛青海諸台吉
通問阿南達領知率兵追及于素爾河擒固蒙多
爾濟等百餘人至肅州并以賊書十四函呈奏三
十六年正月哈密回人擒噶爾丹之子色卜騰巴
勒珠爾等獻軍前阿南達械送至京閏三月疏言
厄魯特晉巴徹爾貝來降訊知噶爾丹窮蹙臣請
竭力進征殲滅醜族

上命阿南達與李林隆率甘州兵二千進勦軍至塔爾河
聞噶爾丹已死其屬下台吉丹濟拉將由巴里坤
竄依策妄阿喇布坦阿南達率兵追之旋奉

詔還駐布隆吉爾以待丹濟拉來歸九月丹濟拉詣哈密
乞降阿南達遣人護送入

親是年叙昭莫多軍功予雲騎尉世職尋奉

詔率兵駐西寧四十年六月卒於西寧

予祭葬如典禮以次子阿敏多幹襲職雍正三年從其長子

巴里坤副將軍阿喇納請追

賜諡恪敏

阿喇納

阿喇納蒙古正黃旗人姓烏彌副都統阿南達長子康熙十九年襲其祖哈岱一等子爵二十七年授三等侍衛洊遷一等侍衛五十年任上都達布遜諾爾牧廠總管五十三年授散秩大臣五十五年十月

聖祖仁皇帝命往巴里坤叅贊軍務

諭令揀選八旗察哈爾勁卒並曾隨阿南達出兵舊人共
四百名率之以行會駐阿爾台散秩大臣祁里德
奏請進勦策妄阿喇布坦

詔阿喇納先往祁里德軍前會同喀爾喀王貝勒貝子公
等詳議進兵事宜再赴巴里坤五十六年七月靖
逆將軍富寧安由巴里坤分兵三道進勦阿喇納
領首隊兵選五百人潛行襲賊邊界至烏蘭烏蘇

擒哨賊二人用為嚮導進兵至烏魯木齊乃還五十八年七月率兵四千與將軍富寧安分道擊賊邊境至齊克塔木擊破賊營擒斬二十人餘悉降之進次開展回衆據城守我師奮擊擒一人縱之歸令傳諭城中曰師行討逆非襲擊若等若速歸順赦勿誅否者破城悔無及矣回衆三百餘人皆降遂入吐魯番酋目沙克扎珀爾等悉衆降附會富寧安軍于烏蘭烏蘇凱旋六十年六月吐魯番

回人托克托瑪木特等以萬餘人駐魯克齊木擊
敗準噶爾兵乞內附阿喇納奉

詔率兵二千往駐吐魯番收撫其衆九月奏請于初冬雨
雪時乘賊無備進兵襲擊尋以冬寒不宜深入

諭令偵賊情形就近襲擊是月賊人來犯阿喇納遣侍衛
克什圖迎擊而自率兵策應戰甫接阿喇納至分
所率兵為三衝擊賊陣賊不能禦敗入林中舍騎
步戰中鎗礮多斃賊大創盡棄軍械馬匹遁我兵

追捕數十里擒斬百餘人提

聞授副將軍仍駐吐魯番六十一年正月

詔議進兵勦賊機宜二月奏言賊進退雖熟踪跡甚輕火
器雖多鉛藥甚少我軍慮周而器備勝賊者一賊
恃鎗戟少弓箭我軍鋒鉅弓勁勝賊者二賊衆臨
陣易敗惟伺隙劫掠我軍部伍整肅無間可乘勝
賊者三賊以乘夜盜馬為得計我軍有備賊不得
入勝賊者四賊侵我邊外曠地遊牧自謂便易我

軍一至賊顧戀妻子牲畜不能一心迎戰勝賊者
五以勁旅直搗伊犁不難掃蕩巢穴惟賊徑甚多
處處可以通我駐兵後路賊來一夕可至若遠設
汛界被賊攔截輒至消息阻隔即今所種吐魯番
地畝亦須防踐擾請將巴里坤阿爾台兩路大兵
移駐烏嚕木齊臣等移駐附近吐魯番險要之地
彼此接應既可守護屯田亦可斷賊人潛襲之路
其進剿大兵宜分三路阿爾台兵由科布多沿河

越額爾齊斯河進發巴里坤兵由烏魯木齊進發
吐魯番兵由阿勒輝口越那刺特嶺進發賊三路
來迎則勢分易敗若一路拒戰則我以一軍奮擊
趣兩軍直抵其妻子屯駐之地彼必不能兼顧賊
所恃為險要者三嶺然步行可上非若棧道之難
也所恃以資生者羊牛乳酪然久駐則水草無多
牲畜易竭勢必離散請及時聚糧練兵相機勦滅
疏下議政大臣尋議阿喇納陳奏詳明能得肯綮

我兵屯墾之地防賊潛犯宜令酌留馬兵捍禦擒
勦惟阿爾台至烏魯木齊沙漠間阻二千餘里往
返較遲今賊已竄匿伊犁稍緩則其黨自相疑貳
然後統兵進取為便

世宗憲皇帝雍正元年七月疏言察喀爾兵久在行間遇
軍營護軍校驍騎校補用但軍中出缺甚少較之
未嘗効力及軍中撤還之人陞補較遲未為平允
請下部酌議

諭議政大臣曰自進剿策妄阿喇布坦已經八載凡出征之京營八旗及盛京黑龍江寧古塔西安右衛滿洲綠旗蒙古察哈爾官兵有久在行間即應陞用者嗣後令諸路將軍詳加揀選將應陞名冊咨送各旗都統護軍統領及督撫提鎮遇有缺出即行題補并令揀員署理俟補授之員陞轉時即以署員請補則行間既獲陞遷之路即各營才力可用者亦無慮致嘆積薪其交兵部通諭中外知之九月授阿喇納鑲紅旗蒙古都統仍留

駐吐魯番十月進征青海羅卜藏丹津

允撫遠大將軍年羹堯請

命阿喇納率滿洲蒙古綠旗兵二千駐防布隆吉爾二年
三月賊酋阿喇布坦蘇巴泰劫我邊境阿喇納遣
總兵孫繼宗等率兵擊之追奔至推默爾賊兵拒
戰大敗之賊竄還獲牲畜器械甚衆七月卒于布
隆吉爾遺疏為其父阿南達請謚部議以副都統
例不予謚格之

特旨如所請行又

諭曰副將軍阿喇納駐軍布隆吉爾宣力有年患病溘逝
朕深為軫惻加恩于一等子爵外賞給騎都尉世職許
其子并襲于甘肅藩庫內給銀一千兩交與阿喇納之
弟準扎布送觀回京十一月喪還

命八旗蒙古大臣出城迎奠

予祭葬如典禮謚僖恪以其子伍米泰襲世爵為三等伯
十年九月禮部以應入賢良祠諸臣列奏

上諭曰阿喇納恪謹持躬忠誠奉職前者西陲用兵宣力
年久收復吐魯番平定青海俱有勞績其應否入祀九
卿會議尋入祀賢良祠乾隆十五年加伯號曰誠毅

舒明

舒明蒙古正黃旗人姓烏梁海濟勒莫特由二等
侍衛擢頭等侍衛乾隆九年授綏遠城副都統十
年調右衛副都統十五年

命辦理青海事務十八年授正白旗滿洲副都統十九

年八月授都察院左副都御史十月兼正黃旗護
軍統領二十年正月赴北路軍營管理輝特台吉
等游牧十月授吏部侍郎十一月奏言輝特台吉
達瑪林率屬六十餘戶來尋妻父都爾伯特汗策
凌請將其屬人編入佐領與策凌同居游牧並
封授職銜

上允所請授達瑪林扎薩克台吉十二月以策凌等告
稱生計稍艱請移至額克阿喇勒游牧得

旨如所請行二十一年二月偵降酋訥默庫戕臺站侍衛謀携游牧叛馳奏

勅叅贊大臣阿蘭泰速往擒阿蘭泰奏請調兵防護並遣詢訥默庫同部台吉策凌

諭責其紛紛派兵虞洩漏三月訥默庫就擒上以舒明籌辦妥協阿蘭泰推諉幾至遲誤

命卓阿蘭泰男爵給舒明以示鼓勵詳見阿蘭泰傳四

月遵

旨偕阿蘭泰編達什達瓦屬為三旗移阿勒台五月奏
請調扎布堪駐劄兵五百交侍衛三都卜領駐布
延圖從之六月奏噶雜特宰桑根敦為烏梁海所
掠率所屬九十餘戶投誠得

旨根敦著授為佐領暫與丹畢游牧同居又奏策凌烏
巴什巴圖博羅特及達瑪林等屬人生計艱窘請
賑

諭賞米六百石分給接濟尋奏都爾伯特台吉烏巴什

同伯什阿噶什投誠得

旨伯什阿噶什已封親王烏巴什亦著封為貝子在額爾齊斯等處游牧俟明年入覲七月奏內閣侍讀學士富森帶達什達瓦屬七千五百餘人于六月至阿拉克綽爾知會臣等指定安插地方查和通鄂博布拉罕蔡罕托輝等處係扎哈沁舊游牧地寬水草充足已遣主事巴杭阿迎富森等至彼定界安插報

聞先是舒明奉

旨查和托輝特青滾雜卜叛迹至是奏叛迹已著

命會同親王成衮扎布等擒拏八月授叅贊大臣尋奏

青滾雜卜現居游牧其屬移唐努山得

旨唐努山距新烏梁海甚近著舒明選派侍衛數員同

桑寨多爾濟護衛都喇勒遣往新烏梁海曉諭總管

亦倫帶兵協擒九月奏伯什阿噶什烏巴什等屬人

請暫留居喀達青吉勒得

旨前命安插伯什阿噶什屬人于額克阿喇勒地方自
喀達青吉勒移至彼處程途既遠且時屆嚴寒行走
稍艱著即照舒明所奏辦理尋

諭曰據成衮扎布奏請派科卜多兵二百名交舒明前
往協擒青滾雜卜著即帶領前往科卜多駐劄兵丁
尚多並著再派三百名令侍衛巴寧阿勒泰會同舒
明前往十月奏言前經成衮扎布遣察哈爾營總圖
炳喀爾喀護衛齊納圖往烏梁海途中獲青滾雜

卜遣往烏梁海之伯爾格等三人臣等訊問據供
青溪雜卜遣赴公丹拜貝子彭楚克處調兵八百
名俱不聽且挈送前來等語隨委員解赴成衮扎
布軍營得

旨伯爾格等現在解送成衮扎布軍營著嚴訊正法新
舊烏梁海等並無一人附和青溪雜卜聽其調遣大
兵一到即可擒獲著成衮扎布即速領兵前進勿少
遲疑十二月

命同成衮扎布在烏里雅蘇台軍營辦事二十二年授
理藩院侍郎二十三年三月

諭來京署理正白旗蒙古副都統五月以成衮扎布奏
請令舒明帶左副將軍印回烏里雅蘇台辦事九月
奏稱俄羅斯界所設阿噶爾等卡倫為和托輝特
之烏梁海等賊奪馬駝傷兵丁已派喀爾喀台吉
達瑪林扎卜等同和托輝特扎薩克達什朋楚克
協擒得

旨著傳諭成衮札布于北路索倫兵內酌量帶領進剿
或即于喀爾喀派老成歷練之人以所部兵丁追獲
渠魁正法示衆不可致令漏網二十五年三月授歸

化城都統九月

命暫署綏遠城將軍印務二十六年十一月授綏遠城
將軍兼署歸化城都統十二月

陞見二十七年正月卒子雅滿泰襲三等男官正白旗
蒙古副都統

命往西藏辦事五十三年廓爾喀擾後藏界雅滿泰措
置車方

詔革職給筆帖式五十五年三月授頭等侍衛五月
命協辦西藏事務五十六年九月以廓爾喀復擾藏界
詔革職枷責

薩喇勒

薩喇勒厄魯特人初為準噶爾台吉達什達瓦宰
桑乾隆十五年準噶爾內亂薩喇勒率屬四十七

戶投誠

詔安置察哈爾隸蒙古正黃旗尋授散秩大臣十七年
準噶爾台吉喇嘛達爾扎請遣薩喇勒還

上不許十八年

命授北路軍營叅贊大臣十九年正月率兵五百擒擒
入卡倫之烏梁海得木齊扎木叅等于科布多

諭曰薩喇勒感戴朕恩遵奉指示無忝任使甚屬可嘉
著加恩補授內大臣尋

命收烏梁海衆當薩喇勒擒扎木泰時釋還收凌朔岱
訥庫勒等十人至是告稱宰桑雅爾都得木齊阿
茂海欲來歸乞駐牧烏蘭固木克木克木齊克薩
喇勒飭其親至許駐特斯河不則駐之阿爾台山
之外並請發厄魯特兵聽調尚書舒琳德以為未
便

諭曰薩喇勒辦理招諭驅逐烏梁海事宜頗屬奮勉軍
營將軍大臣等劄付不合機宜薩喇勒未免掣肘新

降杜爾伯特車凌之人即調遣亦無不可但游牧未
定或致逃竄于事無益著舒赫德會同薩喇勒車凌
等議將伊屬下最可信任之塞卜騰等台吉宰桑酌
派數員領兵一二百名再令御前侍衛永柱會同總
管阿敏道揀派察哈爾八旗兵五百名帶領交與薩
喇勒為招諭驅逐之用薩喇勒係熟悉此路之人相
機行事務期迅速成功不必照將軍大臣等所飭固
執而行三月薩喇勒兵至卓克索烏梁海宰桑雅爾

都車根赤倫察達克圖布慎瑪濟岱各鄂拓克竄
徙阿爾台山外薩喇勒奏烏梁海等已遠遁但貪
戀故土必仍回牧彼時整兵速出易于收服請暫
撤兵還

允之是月

命薩喇勒來京面領

諭旨再赴軍營六月

諭曰今年春薩喇勒等帶兵驅逐準噶爾之烏梁海等

俱已遠避我兵既撤伊等或潛回原處明年大兵進
勦準噶爾倘伊等暗送信與準夷或乘間肆竊俱有
闕係應即遣兵先為辦理薩喇勒等到軍營時著公
同酌辦七月輝特台吉阿睦爾撒納來降

命薩喇勒迎勞頒賞九月偕喀爾喀貝子車木楚克扎
布等率兵千八百擊前竄徙之雅爾都車根赤倫
察達克四宰桑于察罕烏蘇薩喇勒先得勝獲馬
牛羊無算先是有扎哈沁宰桑庫克新橋木特者

犯卡倫追之弗獲達青阿誘執之

上罪其不武令縱之去禡木特移牧布拉罕察罕托輝
不即降道遇通禡木特被擒繫之諾海克卜特爾
薩喇勒偵知之十月由烏蘭山後掩擒通瑪木特
並獲庫克新禡木特送軍營安置其戶畜于庫卜
克爾克勒事

聞

諭曰薩喇勒遇事奮勉此次首先進取克成此功著賞

給世襲子爵補授正白旗領侍衛內大臣時定議征

達瓦齊

命薩喇勒為定邊右副將軍二十年正月

詔領哨探兵同叅贊大臣鄂容安等由西路進征

諭鄂容安曰新厄魯特進兵時肆行搶掠北路將軍班

第業經奏聞朕已曉諭定邊左副將軍阿睦爾撒納

等西路哨探兵前進亦宜禁止薩喇勒之兄現在彼

處如給伊微物及伊屬下略為饋遺可無深究若過

分貪掠鄂容安即以已意提撕薩喇勒一經指示自當歛戢鄂容安其審擇輕重留心辦理又

諭薩喇勒曰阿睦爾撒納以托忒字奏請將伊游牧移居烏里雅蘇台等處朕以事屬可行已准其請惟奏請印文招降伊輝特屬人一事是欲其取多人占據地方之意已經微露似平定準噶爾專偽伊一人集事矣薩喇勒到彼務須留心防範慎勿任其所行然亦不可稍為洩漏此時進兵愈速愈妥薩喇勒其善體

朕意二月薩喇勒等疏報扎哈沁得木齊巴哈曼集
以三百餘户宰桑數多克以千餘户來降隨宣

敕諭令安居毋恐

上獎其妥協

命北路投誠人員照此辦理薩喇勒復遣侍衛瑚集圖
賁

敕諭達瓦齊同族台吉噶爾藏多爾濟尋率台吉諾海
奇齊等三十餘人來降

詔封為綽囉斯汗

諭曰據薩喇勒奏準噶爾大台吉噶爾藏多爾濟率衆投誠看來大功告成在指顧間不勝欣慰薩喇勒遵朕訓示動合機宜俟成功後加恩優叙先將朕所佩荷包賜予並賞給雙眼翎以示優獎又

諭曰薩喇勒等奏帶領噶爾藏多爾濟投誠人等前進又羈留達瓦齊來使帶往進發辦理悉中機宜伊泰內有噶爾藏多爾濟心迹叵測之語朕思噶爾藏多

爾濟雖不可深信既已投誠帶兵同進諒無意外之虞若防範太過恐伊反生貳心惟有示以大度默化其疑懼之意而已三月薩喇勒疏言臣前奏請俟將軍永常到烏魯木齊將臣所領疲乏兵裁駐交伊統領為聲援增派和託輝特等兵起程仍飭索倫兵殿後其餘各隊俱徐行息馬力以張聲威據阿睦爾撒納咨北路兵業經起程臣密奉

諭旨令西北兩路哨探兵于博羅塔拉會合進勦毋令

北路先發今若照臣原奏侯永常到起程必在北
路之後臣等一面飛檄永常令督催和託輝特及
索倫兵速進一面于寧夏涼州莊浪滿洲兵內揀
選膽壯馬可至伊犁者派兵四百令和起齊努渾
帶領臣等同進發復商派新降台吉噶爾藏多爾
濟兵三百其姪扎那噶爾布兵六十噶勒雜特宰
桑哈薩克錫喇兵五十輝特台吉巴雅爾等兵五
十扎哈沁宰桑敦多克兵三百呼爾璘台吉納穆

奇兵三百于三月二十七日自羅克倫啟行計程
四月十五日可抵博囉搭拉合北路大軍四月疏
言臣等領兵前進招撫各部人衆綽羅斯台吉衮
布扎卜及弟三濟扎卜布庫努特台吉巴爾珠爾
當扎木素呼爾璫台吉納木喀喇木錐阿巴噶斯
哈丹得木濟普爾普及吐魯番伯克莽阿里克等
皆率屬來降共四千餘戶葉爾羌喀什噶爾和卓
木獻玉盤一願為臣僕各令回原牧再新降輝特

台吉巴雅爾等請給地耕牧臣等如所請令往吐魯番莽阿里克處領取又將阿睦爾撒納屬人二百餘及額林哈畢爾噶窮夷八百餘戶俱附有牲畜之扎哈沁宰桑敦多克等屬下給籽種令其耕牧臣等由羅克倫啟行噶爾藏多爾濟率姪扎那噶爾布隨營効力形迹尚無可疑且將軍永常現駐烏魯木齊而和託輝特台吉旺布多爾濟厄魯特公丹拜及索倫巴爾呼兵續進應援防範周密

彼亦不能乘隙覬覦臣等辦理諸事留數日此際
達瓦齊想已得兩路進兵之信若不遣人招服恐
其遠颺因繕檄曉諭利害飭侍衛塔奇圖及臣薩
喇勒屬前鋒策稜等由烏蘭烏蘆先往傳諭兩疏入
詔獎薩喇勒等盡妥協以

御用寶石朝珠

賜之薩喇勒兵至額林哈畢爾噶察新降詣台吉宰桑
有不願噶爾藏多爾濟為汗意疏請停頒

諭旨又言新降人編旗分佐領若按戶清查恐致驚疑
令各將所屬戶口開報即交伊等管束

諭曰薩喇勒相機酌辦甚可嘉予著即傳諭玉保將朕
所降封噶爾藏多爾濟為汗之旨不必宣諭薩喇勒
自進兵以來諸事奮勉又能詳察彼衆情形為此陳
奏甚合機宜不特額林哈畢爾噶等處台吉宰桑情
有不願倘準噶爾全部誤認以噶爾藏多爾濟代達
瓦齊為汗輾轉傳播關係甚大今暫行停止不即宣

諭則衆人俱無猜疑于進兵事宜大有裨益薩喇勒著賞銀一千兩即遣人送至伊游牧處以示鼓勵尋諭曰據薩喇勒奏領兵已過博羅布爾噶蘇台至登努勒台達瓦齊所屬並無一人防守其伊犁附近之台吉宰桑喇嘛等已遣人前往招降所辦機宜悉協不勝欣慰至所奏功成後請停止伊犁駐兵一事薩喇勒等蓋因準噶爾近年以來生計窮蹙若多駐官兵恐不無勞費起見耳朕前此諭令駐兵原非欲令久

成以現辦四衛拉特旗分佐領并五集賽各鄂拓克
及哈薩克布魯特邊界一切事宜若不令大臣駐劄
遇有應行查辦之事無所統率究屬未協且既駐大
臣不能不酌量駐兵備差遣著班第薩喇勒等至伊
犁時會同妥議具奏是月薩喇勒等既抵登努勒台
將軍班第等亦至尼楚袞兩路大軍合時達瓦齊
居伊犁河西之格登懣不設備五月西路大軍由
喀塔克渡口越克特滿嶺北路大軍由固勒扎渡

口越推墨爾里克頗直抵格登達瓦齊驚遁未幾

就擒伊犁平

詔封薩喇勒一等公

賜超勇號

賞寶石頂四團龍服六月撤大軍還

命阿睦爾撒納入

覲薩喇勒同班第鄂容安駐守伊犁班第等奏准留察

哈爾兵三百喀爾喀兵二百備差遣尋

諭曰侍衛濟福回京奏稱薩喇勒聞知伊子信息惟以
追擒達瓦齊為事並未遣人往尋等語薩喇勒出力
奮勉不以私事廢公實能明曉大義朕心深為嘉予
此時伊子玉魯斯諒已回至游牧著加恩授為三等
侍衛此朕特加優眷傳諭薩喇勒知之七月班第奏
薩喇勒與阿睦爾撒納皆私取達瓦齊牧畜什物
彼此甚不協

諭曰薩喇勒歸順已久受恩甚厚諒必不至有僭妄悖

逆之事若因此等小節疑而不用何以收羣策之力
即以掠取牲畜什物而論薩喇勒必不至如阿睦爾
撒納之甚班第等惟當開誠相示據理阻止薩喇勒
自必聽從是時阿睦爾撒納謀叛逗遛途中班第等
屢疏入告薩喇勒亦以為言

上密諭諸臣擒治弗能決八月阿睦爾撒納叛遁逆黨
克什木等作亂班第鄂容安被陷死之薩喇勒為
烏魯特宰桑納親哈什哈之子錫克錫爾格所羈

不得歸十二月薩喇勒遣其兄布林等至巴里坤辦事大臣和起所告稱阿睦爾撒納現在博羅塔拉道都託羅海薩喇勒商同伊犁台吉宰桑等由託和木圖往擊和起以

聞

諭曰薩喇勒駐劄伊犁倉猝遇賊為賊拘留自必愧恨然因兵少力弱中賊詭計被執今伊感念重恩會同伊犁衆台吉宰桑等分路領兵期獻逆賊是其誠心

奮勉始終不渝朕聞之實深嘉予轉復為之惻然著
將軍策楞傳旨慰勞並將荷包鼻煙壺各一件俟薩
喇勒至軍營時即行頒賜又

諭曰薩喇勒原係厄魯特人叩關投誠甫及五年隨圍
出兵奔走幾無寧歲前此命其同駐伊犁亦因伊熟
彼地情形耳及阿睦爾撒納背叛生變班第鄂容安
捐軀盡節而薩喇勒衝陣突出其後力窮被拘留所
以不加深咎者誠以厄魯特風俗原不知殺身大義

未可以世受國恩之滿漢臣子相提並論初非朕之
溺愛厄魯特而然也拘方之士或將謂三人同駐伊
犁彼二臣臨危致命而伊乃覲顏就執其偷生負國
斷難姑容如此則是以祖父世臣受恩深重明于大
義者為此未免過于求全責備而其視薩喇勒為過
高矣夫責人易而當局難平居議論誰則不能獨不
思身當其境可深信其能引決就義如班第鄂容安
所為者恐亦未能多得也俟阿睦爾撒納擒獲之日

朕自分別加罪另降諭旨尋

命司員唐喀祿經理薩喇勒游牧二十一年正月薩喇勒至吐魯番遣人通信巴里坤叅贊大臣達勒黨阿率兵往會二月奏言臣蒙委任駐劄伊犁遇賊竊發不能盡力勦滅致將軍叅贊大臣等捐軀盡節臣力窮被執自知徒死不足塞責隱忍偷生希圖報効遂與台吉諾爾布敦多克等聚兵欲擒逆賊阿睦爾撒納自贖前愆上年十二月內與阿睦

爾撒納交戰數日不勝隨同諾爾布敦多克等由吐爾番前來據伯克莽阿里克言噶爾藏多爾濟欲俟擒獲阿睦爾撒納立子諾爾布林沁為總台吉轄四衛拉特又巴雅爾等知臣至吐魯番帶兵突來意不可測幸臣先入城聞巴里坤調兵將至始回準噶爾人反覆變亂全不可信必調西北兩路兵三四萬併力勦擒逆賊並將各部落人等分別勦撫其準噶爾兵似不可用疏入

諭曰此次薩喇勒甚有畏懼準噶爾之心又恐來京治罪是以故難其說為此陳奏今大兵將抵伊犁若如所奏必待大兵三四萬始可前進則機會已失必致墮賊奸計因降旨令其即同達勒黨阿進剿然伊既懷疑懼未必能盡心擒賊以圖報効將軍策楞等竟不必俟薩喇勒偕行即薩喇勒趕赴一切緊要機宜不必與之商酌尋

諭薩喇勒駐特訥格爾辦事仍授定邊右副將軍三月

命由巴里坤來京策楞奏言侍衛巴寧阿自伊犁回至
軍營告稱上年八月二十三日賊掠台站將軍班
第等由固爾扎赴喀格斯禦之賊甫至薩喇勒欲
奔恭贊大臣鄂容安云賊來當戰胡急走薩喇勒
答云爾何知遂策馬而行喀爾喀察哈爾等俱隨
之去將軍處止司員侍衛及兵丁六十人是夜賊
蠭聚將軍等遂各自盡疏入

諭曰薩喇勒與班第同為將軍自當奮力禦賊果至勢

窮力絀班第等先以身殉薩喇勒或不得已衝突而
出不識死綏之義尚不足責乃竟首先奔竄以致大
衆潰散是二臣雖死于賊而薩喇勒亦不能無罪但
係巴寧阿一面之辭應將薩喇勒解京質對著傳諭
黃廷桂俟薩喇勒至肅州時即鎖拿速行押解來京
嗣薩喇勒至供逃出是實

命革職永遠監禁

諭曰班第鄂容安同薩喇勒駐守伊犁當逆賊叛亂之

時班第鄂容安捐軀殉節而薩喇勒獨自脫逃及拿
解來京朕親加審訊據稱彼時以賊衆四集恐力不
能支是以帶兵逃出冀圖再舉等語朕因其所言情
節尚應質對今巴寧阿柏琨等到京質訊之下言頗
相符但供拔去所賜孔雀翎而逃是其偷生負國已
屬顯然在滿漢世受國恩之臣而臨難苟免自當明
正典刑伊係厄魯特新附之人不足責以死綏大義
今班第鄂容安靈櫬已到朕親臨祭奠優予卹典靈

櫬俱令進城即著旺扎爾帶同薩喇勒前往班第鄂
容安樞前將逆黨克什木等先行馘耳祭奠令薩喇
勒在旁看視夫人孰無死使薩喇勒亦能如二臣之
決計就義則今日哀榮之典自當一體同受而乃顏
越至此使伊稍有人心能無愧乎二十二年

諭曰薩喇勒當厄魯特變亂時觀望畏縮不能奮勇復
讐是以降旨拿問但伊魯奏及巴雅爾雖降必叛其
言頗驗今巴雅爾等既已生擒扎那噶爾布亦經獻

馱哈薩克阿布賚率屬歸誠計阿睦爾撒納自可旦
夕俘獲著將此等情節傳諭薩喇勒施恩免罪出獄
從前賞給瑪木特房屋令其居住二十四年六月復
授散秩大臣鑲白旗蒙古副都統

命乾清門行走八月授內大臣

賞二等超勇伯爵二十五年卒

諭曰內大臣薩喇勒人頗薦寔効力有年今患病溘逝
深為軫惻著加恩派散秩大臣一員侍衛十員往奠

茶酒仍賞銀一千兩辦理喪事二十六年

命圖形

紫光閣

御製贊曰彼中宰桑識時早歸副帥以往克贊戎機拔
身戰出不忘本朝云胡不死責備則澆子玉魯斯襲

伯爵

巴圖濟爾噶勒

巴圖濟爾噶勒厄魯特人乾隆十九年以杜爾伯

特宰桑投誠隸蒙古正黃旗人二十年五月大師
征準噶爾達瓦齊擁衆萬人踞格登山崖巴圖濟
爾噶勒與翼領喀喇巴圖魯阿玉錫新降宰桑察
哈什以兵二十餘往探乘夜衝入大軍繼進賊驚
潰達瓦齊遁收所居大蒙古包及礮六降其台吉
二十宰桑四親兵五百兵四千餘

諭曰喀喇巴圖魯阿玉錫巴圖濟爾噶勒察哈什等遵
令乘夜翻營一鼓先登所向披靡尤為實力奮勉俱

加恩授為散秩大臣加賞男爵世襲八月阿睦爾撒
納叛阿玉錫奏巴圖濟爾噶勒黨惡執之

諭歸部管轄十一月厄魯特侍衛丹津告訥默庫欲逃
叛

命辦事大臣阿蘭泰擒治并將巴圖濟爾噶勒拏解來
京二十一年三月巴圖濟爾噶勒將訥默庫背叛
情形據實陳奏免其治罪加

恩授三等侍衛五月擢頭等侍衛赴達勒黨阿軍營十

一月達勒黨阿奏其効力有勞授散秩大臣二十
二年十月解馬赴濟爾哈朗

命為領隊大臣授鑲藍旗蒙古副都統十一月在哨探
隊內行走二十三年與侍衛鄂實圖扎哈沁得木
齊哈勒拜游牧擒斬哈勒拜及其屬襲執叛賊琿
齊于尼勒喀河盡收其游牧四月擒噶勒襟特罕
桑特克勒德克隨將軍兆惠等由伊犁進勦回部
五月至善塔斯嶺招降布魯特頭人並其屬六十

餘又降阿勒巴齊鄂勒椿等收其馬駝軍械八月
招撫塔拉斯布魯特三百餘戶十月

諭曰巴圖濟爾噶勒原在富德隊內不必隨往葉爾羌
即同巴祿領兵搜捕哈丹阿巴噶斯餘賊及沿途嗎
哈沁等凡奏事行文列名于次不必受巴祿節制巴
祿與巴圖濟爾噶勒當和衷協力以期集事若能盡
剿餘孽併獲哈薩克錫喇則真伊二人之福也十一
月

命速赴富德軍營十二月至伊拉里克因馬駝未至兵
皆負糧械徒行巴圖濟爾噶勒奏將已到開展之
駝饋送續到者速為接濟得

旨嘉獎二十四年正月兵至阿爾吉什時逆賊霍集占
黨侵和闐侍衛齊凌扎布請援將軍兆惠令巴圖
濟爾噶勒與瑚爾起往擊之三月至和闐賊望風
遁偵賊騎七百餘屯踞博羅齊乘霧直前衝擊潰
之追越阜窪勒河勒殺百餘收回人四千餘戶撫

定齊喇塔克克里雅三城

御製博羅齊行紀其事

詩曰博羅齊者鄰和聞賊徇據險偵我軍先是圍解黑
水困元戎遣救擒二臣一為瑚爾起吉林舊族世受
恩一巴圖濟爾噶勒乃厄魯特宰桑其勇誠超羣同
心協力速赴援率軍數不能盈千途歷戈壁不毛之
地負甲步進無俄延哈拉哈什已垂陷齊凌札布馳
來言夜急行至伊立齊時賊望風先逃奔集兵極略

拉哈什賴天大霧彌漫漫乘霧直搗賊營後伺急奮
勇攻中堅斬將奪旗獲輜重孤城恢復餘俱安昔薛
延陀檜神能致雪糞困李勣終乃自敝焉此霧或亦
敵鮮荅翻為我用成功全易云天所助者順向猶未
信今信然持盈知足感

帝佑敢肆志詎能開邊尋下部議叙給雲騎尉世職七月
霍集占棄葉爾羌遁追及于阿勒楚爾賊伏兩山
間我兵分三隊奮擊已圖濟爾噶勒領左翼自辰

至午賊大潰追殺千餘生擒五十奪礮械無算賊
逸入巴達克山界巴圖濟爾噶勒與伊柱領兵八
百于山後堵禦大兵尾至伊西勒庫爾淖爾賊據
險守我師整隊發礮樹回纛降賊萬餘巴圖濟爾
噶勒以功

賞戴花翎給白金九月富德令侍衛賽音圖等往巴達
克山勒獻霍集占派巴圖濟爾噶勒駐兵卡倫張
聲勢瓦罕伯克以戶口降二十五年凱旋

賚銀幣授內大臣

命圖形

紫光閣

御製贊曰杜爾伯特部中傑驍嘉其心直授職本朝凡
與交戰義弗返顧師濟和闐不孤恩遇嗣追叙平定
準噶爾及回部功加騎都尉三十四年授公中佐
領三十七年卒

賜祭葬如例子二長綽克圖襲騎都尉魚一雲騎尉次

普爾普由侍衛隨征金川有功授三等奮勇男官
護軍統領以勦臺灣逆匪林爽文奉

旨加給雲騎尉五十五年卒

賜祭葬如例

欽定八旗通志卷一百八十五

欽定四庫全書

史部

欽定八旗通志卷

一百八十六至
一百八十七

欽定四庫全書

欽定八旗通志卷一百八十六

人物志六十六

大臣傳五十二

蒙古正白旗上 武訥格 明安
達哩 額琳齊岱青 色爾格克

德穆圖 克什圖 阿必達 拉錫 阿蘭泰
憲德

武訥格

武訥格姓博爾濟吉特其先居葉赫後隸蒙古正

白旗

太祖高皇帝創業興京諸蒙古向化武訥格率七十二人來歸有勇畧兼通蒙古文及漢文

賜巴克什號歲癸丑從征烏拉有功授三等男天命十一年大軍圍明寧遠城未下

命分兵攻海中覺華島明叅將姚撫民擁衆四萬倚島列營鑿冰十五里為壕衛以車輜我軍奪壕口進攻盡殲其衆焚所積芻糧及船二千餘乃還天聰三年春同額駙蘇納率左右翼蒙古及滿洲兵八十

征察哈爾降二千戶以歸降者窺我兵少欲叛歸
明遂盡殺其男子惟釋二台吉俘婦女八千有奇
還分隸左右翼養贍之

上怒武訥格蘇納殺降有

旨切責奪所給駝馬牛羊是年冬從征明入龍井關克遵
化進軍都城北土城關明督師袁崇煥自寧遠來
援我左翼蒙古兵迎擊弗勝武訥格率右翼繼進
敗之

賜所俘獲之半犒其軍尋又攻克固安縣四年春克永平
明騎卒三千自玉田出武訥格遣兵擊走獲馬百
餘自永平畧豐潤還聞明兵四千圍大安口城急
赴援破其圍又設伏於樵採處斬獲無算五年從
征明圍其總兵祖大壽於大凌河杏山守將與大
壽書有攜軍士棄城或單騎潛來之語武訥格獲
以獻於是我軍盡知城中虛實乃築壘鑿壕為久
困計武訥格統蒙古軍列營城東南大壽遣兵出

圍我所取臺堡武訥格與貝勒阿濟格等夾攻殲敵過半自是城中兵不敢復出六年同阿濟格招撫大同宣化邊境察哈爾人衆七年同貝勒阿巴泰等攻明山海關俘獲人衆牛馬以歸明兵追及武訥格殿力戰却之

太宗諭諸貝勒大臣曰武訥格所在建功今又殿後敗敵人臣為國義當如是八年五月叙功晉三等公世襲罔替

金史卷一百八十六
賜勅免死罪二次時

太宗率諸貝勒分道征明

命武訥格統左右翼蒙古兵供調遣且策應大軍始與貝

勒德格類收察哈爾降者千餘戶繼由獨石口越

長安嶺至保安州會大軍於應州所過或攻或撫

悉稱

吉閏八月自得勝堡班師遇逃入陽和之蒙古四百七十

餘人收以隨軍九月喀爾喀部長族屬有為察哈

爾衆邀殺於路者奉

命領兵百人往緝追斬二十餘人而還九年二月卒

恩卹如典禮第三子廣泰襲三等公爵長德穆圖次齊墨

克圖自有傳

明安達哩

明安達哩蒙古正白旗人姓西魯特世居科爾沁

父博博圖

太祖高皇帝時率七十餘戶來歸即授為佐領俾轄所屬

太宗文皇帝天聰元年隨征明錦州歿於陣予三等輕車都尉世職明安達哩襲兼管佐領崇德三年任護軍叅領隨貝勒岳託征明由密雲東北毀邊牆進同都統伊拜擊敗明太監馮永盛兵攻克南和縣六年隨大軍圍錦州敵據山巔列陣明安達哩率所部護軍衝擊敵潰遁松山敵騎來犯復擊敗之我師鑿壕駐守敵兵出錦州城奪橋明安達哩擊却入城

上親督師敗明總督洪承疇三營步兵明安達哩奮勇力
戰又擊敗敵騎叙功晉二等輕車都尉七年冬隨
貝勒阿巴泰征明薊州薄燕京破明總督趙光抃
軍又同前鋒統領阿山擊走三河縣步兵進略山
東八年春師還明總兵白廣恩張登科和應薦等
邀戰螺山明安達哩率所部擊之潰又同護軍統
領鰲拜破明總督范志完軍凱旋

賚白金是年擢禮部叅政兼正白旗蒙古副都統順治元

年隨大軍入山海關擊敗流賊李自成二年隨英親王阿濟格征自成於延安府七戰皆捷招撫鳳翔等府降者三十餘城三年改兵部侍郎值蘇尼特部騰機斯與弟騰機特叛明安達哩隨豫親王多鐸率師往征扼據險要騰機斯等聞風遁走明安達哩乘夜追逐至鄂特克山大破賊衆斬其台吉茂海復同鎮國將軍瓦克達等追勦手斬十一人獲其輜重並擊敗土謝圖汗及碩雷汗兵五年

擢正白旗蒙古都統七年兼任兵部尚書先是叙入闕征流賊及征騰機斯功晉爵至二等男世襲罔替嗣以考滿並遇

恩詔晉一等男加一雲騎尉八年以議敘福建湖廣大同軍功遲延削雲騎尉罰鍰九年列議政大臣復遇恩詔晉二等子十年以徇隱興安總兵任珍擅殺事覺罷尚書任降世職為一等輕車都尉兼一雲騎尉十一年統兵征俄羅斯敗敵於黑龍江十三年

上以明安達哩在部日久練達庶務授理藩院尚書十五

年十二月

命為安南將軍率師駐防荊州十六年海賊鄭成功犯江
寧明安達哩率師赴援賊艘千餘泊三山峽明安
達哩督兵擊敗偽都督楊文英等擒斬偽副將一
獲船艦器械甚多賊退竄入海明安達哩旋奉

詔移師浙江駐防舟山十七年還京仍授兵部尚書康熙
三年考滿加太子太保六年調吏部尚書旋因疾

致仕八年二月卒

賜祭葬如典禮諡敏果子都克襲

額琳齊岱青

子扎木素

額琳齊岱青姓博爾濟吉特世居翁牛特初為察

哈爾宰桑

太宗文皇帝天聰六年大軍征察哈爾其汗林丹驚懼率

衆奔土默特部旋自竄唐古特部部衆相繼散額

琳齊岱青欲歸我

朝會察哈爾部多爾濟塔蘇爾海率所屬遊牧與大
軍遇倚山拒戰敗遁額琳齊岱青追及與之謀歸

順八年八月

上征明大同凱旋出尚方堡額琳齊岱青遂同多爾濟塔
蘇爾海率七百戶來歸

上遣大臣率兵衛其家屬至

盛京

賜賚優厚分隸蒙古正白旗崇德元年封二等子三年隨

睿親王多爾袞征明毀青山口邊牆入越燕京趨
山東額琳齊岱青遇敵輒奮戰克捷六年隨鄭親
王濟爾哈朗圍錦州明兵自松山來援者再又欲
劫我紅衣礮額琳齊岱青皆先衆擊却之明總督
洪承疇集步騎十三萬列營松山額琳齊岱青偕
衆敗其三營步兵七年敘功晉一等子世襲罔替
八年卒子扎木素襲爵尋授散秩大臣順治十八
年十二月

聖祖仁皇帝即位加恩諸大臣之舊自察哈爾來歸者扎

木素與內大臣噶爾瑪散秩大臣沙哩岱等並

賜莊田奴僕康熙三年三月擢內大臣六年七月卒

賜祭葬如例以其子根敦扎布襲

色爾格克

色爾格克蒙古正白旗人姓博爾濟吉特先世居

喀喇徹哩克部父阿拜岱巴圖魯天聰時率衆來

歸予三等輕車都尉世職既卒色爾格克襲屢從

征伐授一等侍衛崇德元年隨豫親王多鐸圍朝鮮國都國王李倬遁南漢山城移師攻之色爾格克奮勇登山身中重創賞馬三匹五年隨鄭親王濟爾哈朗等征明圍錦州色爾格克率侍衛二十人直前搏戰有歸明蒙古僧格依者素稱驍將色爾格克擊斬之鄭親王遣啟心郎額爾赫圖奏其功明年大兵圍錦州令色爾格克選驍勇前鋒兵四十人伏荒地生擒明將一員王貝勒等嘉其勇

敢以所獲鎧甲器械全給之既而明總督洪承疇
自松山來援

上命貝勒大臣設伏高橋色爾格克獨斬敵兵七人賞馬
二匹復先衆擊敗松山敵騎我兵鑿壕圍困松山
城明兵來犯漢軍所守壕塹色爾格克率護軍三
十人應援擊退敵衆七年冬隨饒餘貝勒阿巴泰
征明越燕京攻臨城縣進征山東攻青州府俱力
戰中創順治二年敘錦州松山戰功晉世職二等

輕車都尉六年追敘阿拜岱巴圖魯前此率衆來
歸舊勲分授其諸子各世職色爾格克晉爵二等

男七年九年三遇

恩詔晉一等男加一雲騎尉尋裁

恩詔所加爵職仍改二等男擢任內大臣

聖祖仁皇帝康熙十二年五月

諭獎久著勞績諸大臣加色爾格克太子少保二十年十

月卒

賜祭葬如典禮諡勤敏孫錫扎保襲

德穆圖

弟齊墨克圖

德穆圖蒙古正白旗人姓博爾濟吉特父武訥格
積功授三等公既卒以第三子廣泰襲德穆圖初
任佐領

太宗文皇帝崇德三年正月擢戶部承政七月更定官制
改右叅政四年二月

上親征明松山樹雲梯攻城明兵自錦州赴援德穆圖見

明兵至度不能克敵棄梯而還論死得

旨從寬罰贖尋兼任副都統六年隨鄭親王濟爾哈朗等

圍明錦州有守郭之蒙古貝勒諾木齊等約降鄭親王令德穆圖迎之會諾木齊率衆蒙古與明兵戰德穆圖攜諾木齊之子阿桑喜出大兵既克郭諾木齊始來歸師還以德穆圖曾詭言諾木齊父子俱為所攜出論鞭百罰贖籍家產半革叅政及副都統任專管佐領事七年十月隨貝勒阿巴泰

征明自薊州入邊薄燕京至山東明年六月凱旋得

優賚順治元年隨大軍入山海關破流賊李自成追擊至望都敘功授騎都尉世職二年隨豫親王多鐸擊敗自成兵於潼關平定河南江南敗明將鄭鴻逵於瓜洲又同都統瑪喇希徇常州與明將黃蜚等戰再敗其衆隨分兵攻宜興崑山等縣並克之敘功加一雲騎尉復任本旗蒙古副都統三遇

恩詔晉一等輕車都尉世職九年卒子霍達襲齊墨克圖
者德穆圖仲弟也早歲屢從行陣崇德三年同叅
領沙爾琥達等率蒙古四十人畧寧遠界至紅山
口遇明兵百人逐之斬其裨將二人而還是年弟
廣泰隨豫親王多鐸征明坐違令不前削公爵明
年六月

命齊墨克圖降襲一等男七月同沙爾琥達等率哨卒至
錦州敵兵五百來追還擊敗之獲馬六十及其大

蘇一大兵三圍錦州齊墨克圖皆在軍中累著功績
初圍錦州時敵出城搏戰齊墨克圖控騎截擊陣
斬十人後攻明總督洪承疇步兵三營同叅領武
拜奮勇掩殺遇敵騎來援復擊敗之八年三月同
護軍統領阿爾津哈寧阿等往征黑龍江圍都里
屯克之又招降大噶爾達蘇小噶爾達蘇及能吉
爾三屯俘獲無算師旋

賜貂皮銀幣十一月擢本旗蒙古副都統順治二年以從

大兵入關破流賊功加一騎都尉并為三等子三年隨定西大將軍和洛輝征陝西賊賀珍遣兵破賊黨劉文炳於蒲城賀珍遁奔武功追擊之斬獲甚衆五年四月卒

詔以其子薩哈納襲騎都尉世職仍以廣泰襲一等男爵
克什圖

克什圖蒙古正白旗人姓博爾濟吉特康熙十三年從征福建十六年海賊分犯漳州克什圖隨大

軍至江東橋進擊大敗賊衆二十年從將軍賚塔
由廣西進勦逆孽吳世璠賊將何繼祖等糾衆萬
餘據石門坎隘口克什圖步擊之繼祖等退據黃
草壩克什圖當先奮戰賊大敗又敗賊將胡國秉
劉起龍黃明等於歸化寺二十三年補驍騎校二
十五年敘功授雲騎尉世職三十一年駐防江寧
三十四年還京授三等侍衛三十六年遷二等侍
衛三十八年補察哈爾遊牧總管四十年七月因

逃人私入圍場解總管任十一月授三等侍衛四十二年奉

命使準噶爾還以多騎喀爾喀馬革職五十四年補藍翎侍衛時準噶爾台吉策妄阿喇布坦侵哈密大兵將進討

命克什圖偕原任員外郎保住分路齎

勅往諭五十五年三月還

上召詢情形

諭議政大臣曰策妄阿喇布坦乃巨猾奸詭之人甚屬無恥以朕之使臣非使臣諭旨係部文奏請另遣賢能大員克什圖等出使策妄阿喇布坦處已經數次著仍前往頒示諭旨書諭旨時令克什圖面看繕寫此番使臣到策妄阿喇布坦處得其確實情形大兵即可前進四月克什圖復偕保住使準噶爾授二等待衛並

命復雲騎尉世職五十九年五月從靖逆將軍富寧安由烏爾圖進兵至烏蘭烏蘇口偵賊伏伊勒布爾和

碩克什圖率輕騎夜襲之賊以我兵掩至登山藏
樹石間發火器抵拒克什圖麾兵亟擊殺賊三十
餘擒賊首垂木拍爾十月授副都統六十年六月
回人托克托瑪穆特等來降

詔偕侍衛阿玉錫領察哈爾兵千駐吐魯番納降八月策
妄阿喇布坦遣衆來犯克什圖自出擊而令散秩
大臣阿喇納尾已後夾擊追入林中擒斬甚衆六
十一年

命管理吐魯番等處屯田雍正二年奉

旨克什圖年老著都統穆森同轄屯田兵四年還京授散

秩大臣五年正月授護軍統領署鑲黃旗蒙古都
統四月擢領侍衛內大臣兼議政大臣尋奉

命與俄羅斯定界六年總管北路軍臺七年

諭曰克什圖征勦雲南時頗著勤勞今大臣中與伊相似
者甚少復於軍前衝鋒陷陣得有傷痕且屢次出使準
噶爾又於蒙古地方効力懋著勞績著加授騎都尉世

職九年

命往青海與郡王額爾德尼額爾克托克托等選兵防禦準噶爾是年卒

賜祭葬如例諡勤恪子阿蘭泰襲職官至都統

阿必達

阿必達蒙古正白旗人姓阿拉克奇特康熙十五年以護軍隨貝子傅喇塔勦逆藩耿精忠黨曾養性於溫州生擒偽守備張泗十六年海賊何祐據

泉州都統喇哈達選健卒進攻阿必達先登拔之
得巴圖魯號尋授護軍校二十年署護軍叅領隨
將軍賚塔往定雲南擊賊於石門坎黃草壩武功
山桂花寺均有功凱旋

賜雲騎尉世職三十二年授護軍叅領三十五年隨大將
軍費揚古由西路勦噶爾丹至昭莫多大敗賊衆
諭部優敘加一雲騎尉併世職為騎都尉四十七年以失
察護軍普受叩

閏草職發黑龍江五十二年

赦還京五十六年大軍勦策妄阿喇布坦阿必達請自備
鞍馬赴阿爾台軍營效力署叅領雍正五年奉

旨八旗內曾經躍城之巴圖魯人等無論已未得官或告
退革退人員凡有本身現在者查明具奏部臣引

見

諭曰阿必達著授副都統食全俸入年老大臣班內行走
給還所得騎都尉並賜銀五百兩十二年復

賜銀千兩

優獎之乾隆元年卒

賜祭葬如例其騎都尉世職子阿蘭岱襲卒弟盛保襲卒停襲

拉錫

拉錫蒙古正白旗人姓圖伯特康熙三十年由親軍授藍翎侍衛三十七年遷三等侍衛四十二年遷二等侍衛四十三年四月

命同內閣侍讀舒蘭往窮河源九月還京復

命繪圖以奏語具舒蘭傳四十九年正月

諭大學士修滿洲蒙古合璧清文鑑以拉錫與教習唐古
特書之蒙古官阿爾必特祜等會同繙譯五十三
年遷一等侍衛六十一年十一月

世宗憲皇帝御極

命署理藩院侍郎旋授鑲白旗漢軍副都統又擢正白旗
蒙古都統雍正元年八月授散秩大臣時喀喇沁

蒙古部落歲歉拉錫請行察乏食人數得

旨據奏俟查覆加賑則現今乏食人必致失所其令戶部派員齎銀五萬兩前往一面清查一面給發毋得稽遲

十月調本旗滿洲都統仍管理藩院十一月

諭王大臣曰拉錫任正白旗滿洲都統未及一月即將本旗事件徹底清查明晰具奏著賞給騎都尉世職以為盡心辦事者勸二年二月奏言八旗閒散人蒙

恩旨挑取養育兵前臣等會議計甲喇人數挑取今正白

旗滿洲各甲喇應行挑取者多寡不等請無拘甲喇通計一旗挑取如額庶皆允當行

旨所奏甚是可通行八旗均照此辦理六月奏言察哈爾右翼四旗屢失去馬匹請

敕所司嚴捕竊匪下理藩院議行七月授議政大臣八月劾奏二等待衛武爾登額越分妄用引馬

上曰所奏甚屬可嘉凡為大臣者悉宜如此留心整飭豈可謂妄訐細事耶先是

諭八旗都統曰朕前降旨請釐八旗拖欠庫銀遲之既久爾等並未具奏惟拉錫甫任都統兩月所奏甚詳朕但令一二人償還其餘盡行寬免拉錫誠能仰體朕心者所賞世職尚未從優也至是

命以騎都尉兼一雲騎尉三年四月兼管太僕寺四年八月以隱匿烏梁海事不奏吏部議革職治罪得

旨拉錫將烏梁海之事有心隱匿情殊可惡但伊辦理旗務亦有效力處從寬免治罪其議政大臣散秩大臣都

統兼管理藩院及賞給世職俱革退以一等侍衛管太僕寺卿事効力行走五年五月授鑲白旗滿洲都統十月署江寧將軍六年十二月署天津滿洲水師營都統七年四月疏言水師營官兵俸糧每歲從北倉新廩逐月運送往返紛繁請於水師營堡城內西北隅蓋造廩房二座將運往薊州遵化漕米截留三萬石備貯二年之需俟支放一年外每年截留一萬五千石易陳支放並設倉大使一員專司

出入部議從之九年八月授領侍衛內大臣署正
白旗滿洲都統十一年十二月卒

阿蘭泰

阿蘭泰蒙古正白旗人姓博爾濟吉特父克什圖
官領侍衛內大臣有傳康熙五十五年阿蘭泰襲
雲騎尉世職五十九年授藍翎侍衛累遷二等侍
衛雍正九年襲其父所晉騎都尉十二年五月授
頭等侍衛八月授滿洲正黃旗副都統乾隆四年

命赴塔密爾軍營辦事六年還京調滿洲鑲白旗副都
統十年遷蒙古鑲藍旗都統十二年擢寧古塔將
軍疏言永吉一州駐吉林烏拉係寧古塔地方向
隸奉天府一切旗民事務由彼轉咨不但稽延時
日且辦理掣肘諸多未便請改設理事同知隸寧
古塔將軍轄從之十三年四月調

盛京將軍七月疏言船廠旗民命盜案件現歸理事
同知辦理將軍衙門舊設理刑司主事及筆帖式

二員應裁但繙譯往來文移不可無人請留筆帖式一部議如所請十四年遵

旨酌議護送朝鮮貢使章程奏言向例貢使至邊鳳凰城城守尉點進關門交護行官兵看守沿途俱有館舍後因館舍不敷聽租住村莊恐人多滋事請嗣後貢使入關貨物行李同行按站派官一員兵二十護送遞將次日宿處報知前途地方官代備店舍投宿後護行官兵看守巡邏倘內地不肖之

徒與入貢人役生事拏交地方官究治如地方官
預備不周許護行迎送通官揭報府尹迎送通官
約束不嚴許護行官揭報禮部護行官看守不嚴
許迎送通官揭報將軍如迎送通官任貢使騷擾
及護行官縱容兵丁許地方官揭報該上司均照
例議處下部議行十六年奉天府尹圖爾泰奏義
州倉豆積年霉變請減價平糶

諭阿蘭泰等歲撥近海州縣餘豆一二萬石及現議裁

馬羣應支之豆一併運貯通州備京師平糶阿蘭泰因奏言錦寧廣義四州縣附近海口除民地項下之豆照舊存貯其退地項下每年支剩豆萬七千餘石應儘數運交豐年再照時價購一二萬石搭運運船由天津官催來奉天臣等委員弁攜斛運至天津兌收轉交通倉部議從之十八年疏言我皇上軫念奉天兵丁生計特設滋生銀兩許隨時借給現在兵丁倒斃馬例應買補而所得錢糧僅供食

用請將滋生銀內借給半年錢糧令買補分年扣還
官員有需用者亦請一體酌借議如所請十九年
還京軍機處行走尋

命赴北路軍營授叅贊大臣

諭會同喀爾喀扎薩克等選馬備用毋傷生計二十年
二月大軍進剿達瓦齊阿蘭泰偕額駙色布騰巴
勒珠爾等統哨探兵前進六月達瓦齊就擒凱旋
敘功晉男爵

命留烏里雅蘇台辦事八月輝特降首阿睦爾撒納叛
潛遣心腹人赴扎卜堪取其孥至則阿蘭泰已遵
密旨往收盡執之遷其戶畜於塔密爾會包沁總管阿
克珠勒等竄附阿睦爾撒納阿蘭泰遣總管鄂博什
以索倫兵五百馳追並分截各隘口阿克珠勒就
擒

上獎其辦理合宜九月再授叅贊大臣隨定邊左副將
軍達勒黨阿追剿阿睦爾撒納尋

命仍留烏里雅蘇台辦事二十一年二月杜爾伯特降
苗訥默庫謀叛戕守汛侍衛護軍統領舒明偵得
狀馳以

聞

諭阿蘭泰速往擒阿蘭泰請調兵防護並遣人往詢訥
默庫同部台吉策凌得

旨訓飭三月奏訥默庫就擒

諭曰此事係舒明籌辦甚屬妥協阿蘭泰一味推諉若

照伊所奏辦理必至遲悞著將阿蘭泰男爵革去即
賞給舒明以示鼓勵尋

命偕舒明往駐布延圖七月移駐納米爾沙扎海八月
仍授叅贊大臣隨定邊左副將軍成衮扎布追擒
和托輝特叛賊青滾雜卜十二月隨成衮扎布在
烏里雅蘇台辦事二十三年還京授漢軍鑲黃旗
副都統二十四年遷歸化城都統二十五年卒
賜銀五百兩治喪子法里哈降襲雲騎尉

憲德

憲德蒙古正白旗人姓西魯特祖明安達哩官至吏部尚書有傳父花善官頭等侍衛康熙五十七年憲德由廕生授理藩院主事尋遷刑部員外郎雍正二年遷郎中四年二月授湖北按察使四月奏臣抵任有原任布政使張聖弼來謁查係虧空革職擬斬監追之犯臣牌行武昌府立拿監禁

諭獎其秉公執法十月擢巡撫五年三月請於漢口鎮增

設巡檢一分巡居仁由義二坊以循禮大智二坊隸舊巡檢轄部議從之先是四川夔州府知府程如絲自販私鹽而捕楚民之販私者鎗斃甚衆川陝總督年羹堯劾之適四川巡撫蔡珽威逼重慶府知府蔣興仁自盡被劾至京

召見陳寃抑且力保如絲為四川第一好官事下甘肅巡撫石文焯文焯亦言其寃如絲遂免逮擢四川按察使至是年羹堯敗

上閱其黨汪景祺逆書備載如絲貪殘不法珽受如絲重
賄及文焯妄斷狀於是

命侍郎黃炳赴川覆案其事且

諭憲德將楚民被害者查帶往鞫已而鞫寔如絲珽擬斬
決文焯永停給俸憲德尋調四川巡撫疏言川省
驛鹽茶三項向皆臬司兼管稽核未周請增設驛
鹽道專司其事

詔如所請尋請設鹽茶大使從之九月疏言成都府灌縣

都江堰口廟祀秦蜀守李冰之子二郎相傳父子鑿山穿江溉田至今民享其利請

賜封號疏下部議封李冰敷澤興濟通祐王二郎承績廣

惠顯英王十一月奏各屬增設裁改事宜一復設

成都府之華陽縣增知縣教諭訓導典史各一裁

府屬之稅課大使一改資縣為資州轄仁壽資陽

井研內江四縣裁原設之典史改綿州為直隸州

轄德陽安縣綿竹梓潼四縣改茂州為直隸州轄

汶川保縣二縣及各土司裁威州併入保縣一馬
湖府應裁所屬屏山縣歸叙州府通判移駐馬湖
舊治轄雷波等各土司部議如所請是月奏程如
絲在監自縊

上嚴飭之六年正月疏言上年程如絲斬決部文到在十
二月十九日而京報小鈔前五日已到洩漏寔由
於此請將各省提塘通行裁革

上以提塘之設由來已久未便遽革

諭九卿確議尋議提塘多係微末職銜承充且無保送不實處分請令各督撫於本省武進士及候補候選人員內揀選咨部頂補地方官出結有犯分別議處又奏安置入川人戶事宜一人戶衆多該管官挨查取結編入保甲一戶口姓名人數移查各原籍犯事故者逐回餘酌撥地畝令墾一願回籍者不必給口糧將姓名人數咨明本籍川省仍造冊存案再至者懲之一川省無著地畝現在清丈事

畢應分科則編字號計留川人戶之數按畝均分
認墾三月又請留川人戶以一夫一婦為一戶給
水田三十畝或旱地五十畝兄弟子姪成丁者丁
給水田十五畝或旱地二十五畝一戶內老幼丁
多不敷養贍者臨時酌增俱給照票並牛種口糧
分年陞科均如所請行七月疏言夔州關稅向委
知府監收請照潯墅淮關例差監督一員徵課按
年輪替十一月請改成都府同知為管糧水利同

知經理都江以下各堰工並從之尋請令清查地畝之員搜查鹽茶積弊

諭曰川省鹽茶二項既經特設道員專司其事自應責成該道令其公誠督察期於清楚倘不能勝任即屬溺職當予叅黜另用賢員今乃言該道亦茫無端委則設立專官何為耶至於差往科道京員係為清理地畝以息豪強之爭奪兼安插流民使之得所儘足辦理矣若又將鹽茶等事交予經營便寬予限期豈如該道之久在

川省可比稽查過急必致騷擾民間滋生事故脫有遺漏將來反得推却且據汝奏內搜查挨查之說更屬謬妄鹽茶積弊相沿已久自應商酌從容清理之法安可如此嚴急從事觀汝一切料理處過急而欠變通只圖己身免咎而已不肯擔承利害實心任事於此一奏心行畢見非朕委信之意也嗣後當深以為戒十二月奏於達州拿獲年羹堯案內要犯淨一道人得

旨議叙加一級七年正月奏天全土司改流等事一天全
改為州設知州吏目各一駐碶門州同分駐始陽一
天全州應隸府轄請陞雅州為府設知府經歷
各一增置附郭一縣設知縣典史各一即以新置
之一州一縣及名山滎經蘆山三縣歸府轄從之
尋定雅州附郭縣曰雅安十月疏言川省州縣先
因地廣事簡將雙流等縣裁併今生聚日繁請復
其舊成都府復設雙流崇寧彭縣三縣綿州復設

彰明羅江二縣重慶府復設大足璧山定縣三縣
夔州府復設大寧新寧二縣潼川州復設安岳縣
眉州復設彭山青神二縣嘉定州復設威寧縣設
知縣訓導典史各一裁羅江驛驛丞驛務歸知縣
管理裁打箭爐沿村二驛驛丞驛務歸雅州同知
及瀘定橋巡檢管理十二月疏言黎大所地方為
西南孔道漢夷雜處請裁原設之千總改置一縣
隸雅州府轄設知縣典史各一以典史分駐泥頭

又建昌之寧番衛已改為冕寧縣應裁去冕山所
千總部議從之尋定黎大所新設縣曰清溪八年
正月請於新設寧遠府漢境內擇大村堡照義學
例建學舍延塾師令熟番子弟來學俟學業有成
往教生番子弟如所請行四月署川陝總督查郎
阿奏言川省墊江忠州等屬奸民楊成勳等造妖
謠吹螺嘯聚事覺成勳自縊獲其黨陳文魁楊成祿
等訴狀怨白等稿內列丈量田地科派需索累民等

事有禍冤起於戊申年奉

旨清丈民田及上憲愛民如子察冤如神之語

諭曰四川清丈之舉始於馬會伯之奏朕惟恐不便於民
諭令憲德悉心酌議以定行止隨據憲德奏稱蜀省昔
年以來人民稀少田地存在荒蕪及至底定歸復祖業
者從來未經勘丈是以多所隱匿迨歷年既久人丁繁
衍姦猾之徒欺其界畔無據遂相爭構訟今應明白曉
諭令將所管田畝分立地界各執本名立戶載入版籍

每年納糧俱以串票為據如此則侵隱欺奪之患可以
悉除又川省詞訟為田土者十居七八率為界址不
清亦非勘丈無以判其曲直憲德之奏如此朕又詢問
岳鍾琪據奏與憲德之言相同隨交九卿會議九卿亦
以應當舉行合詞覆奏朕於是慎選科臣高維新等前
往辦理伊等陛辭之日諄切訓誨務期剔除積弊安插
善良並非為加增賦稅起見又復頒發諭旨百姓果有
冤抑下情准其十數人同到督撫及欽差官員衙門控

告為之秉公審理此從前遣官清丈之始末也其勘丈造冊等費俱令動支帑金各官供應等項俱令從公支給不使幾微煩擾閭閻上年冬月丈量之事將竣朕又念各屬徵糧科則輕重懸殊其田土肥瘠不等則賦稅自難畫一又復降旨凡隱瞞科則等處止據實按則更定至於額糧稍重之州縣即比照就近適中地方之科則令其核減以紓民力今年正月憲德以清丈事竣具本代達川民謝恩之詞稱通省士民咸稱清理疆界使

強無兼并弱無屈抑又荷鴻慈將田不敷糧之戶悉予
開除疆界既已分明額賦尤為公溥等語朕亦以為經
理得宜豈意奸民嘯聚竟引清丈苛虐為言怨白中公
然寫為奉旨清丈豈非該撫憲德等但以清丈之事稱
為奉旨於己身奏請之處並未曉諭於衆耶陳文魁訴
狀內稱上憲愛民如子察冤如神伊既稱頌川省上司
是必憲德等有沽譽於民之道何不將朕之德意廣為
宣播而乃朦混含糊使奸民得以藉口耶憲德既稱通

省士民惟呼感戴何以尚有陳文魁楊成祿此等匪類
暗結邪黨肆行誹謗可見平日地方大吏化導之未周
董戒之不力則深山窮谷安保無惑於妖言而妄為邪
議者乎清丈一事既曾奉旨朕豈肯推卸於臣工但其
舉行之由始於該撫陳奏而非朕本意朕不肯推卸於
臣工臣工又安可推卸於朕耶數年來朕以此事時為
厯念昨據合省謝恩之奏而論似於地方有益其功亦
憲德之功若果如奸民所言則該撫失於覺察咎有所

歸朕在九重之上萬里之外安能代為之謀耶著憲德
將朕此旨刊布曉諭務令遠鄉僻壤共知之十一月請
改成都府屬之松潘衛歸龍安府轄又請復設川
北道駐保寧府九年二月又請將平武縣之關家
村石子村檢石壩紅豆樹等處歸江油縣轄播鼓
坪鄧家渡等處歸石泉縣轄青蓮壩五郎溝等處
歸彰明縣轄彰明與龍安府附近請即改隸龍安
並如所請先是建昌總兵趙儒奏請於會川寧

番等處開採鉛砂事下憲德議行十年三月紫古
喇廠商民為兒斯堡生番所殺憲德言礦廠八處
其獲砂多者請仍開採少者封閉以杜釁端

諭曰從前趙儒奏請開採彼時朕即不然此舉詳詢憲德
回奏極言有利無害是以交部議行乃兩年以來並無
成效徒滋煩擾當日奏請是何意見憲德著交部察議
所開礦廠概行封閉尋議降一級調用行

旨從寬留任十一年正月

諭曰川省為產米之鄉歷來聽商賈販運從長江至楚以
濟隣省之用雍正九年巡撫憲德以川省米價稍昂又
復碾辦軍需奏請暫禁商販此不過一時權宜之計至
雍正十年川省收成豐稔米價平減憲德即當奏請開
禁乃至今照前禁遏以致米價不能流通楚省不得川
省之益甚非大臣公平辦事之道況今江浙有需米之
州縣望濟於楚省而該撫不令川米赴楚則隣省何以
資賴著即傳諭憲德速弛米禁毋蹈遏糴之戒五月請

諭曰凡一省中鹽課引務莫非汝等督率之責果曹源邠
著有貪婪不法形跡即當列款糾叅若止改撥不當汝
等何難商酌合宜而更正之今但云不敢隱蔽祈朕勅
部察議竟將嵯政視如無涉然不知是何意見覽奏朕
甚鄙汝等有玷督撫統轄訓飭之任也十二月

召來京尋授工部尚書十二年六月兼議政大臣七月調
刑部尚書仍兼工部尚書事署滿洲正紅旗都統
乾隆元年

命赴

泰陵督辦工程二年疏劾承辦工程之工部郎中宏通在
易私赴鄭州又藉覓料估之人來京日久未歸曠
官廢職請交部嚴議尋議革宏通職憲德失察降
一級留任五年卒子夢麟官工部侍郎別有傳

欽定八旗通志卷一百八十六